

**“ORDENANZA FISCAL Nº II.17 REGULADORA DA TAXA POLA UTILIZACIÓN PRIVATIVA OU O APROVEITAMENTO ESPECIAL DO DOMINIO PÚBLICO LOCAL (SOLO, SUBSOLO OU VOO) POR EMPRESAS EXPLOTADORAS DE SERVIZOS DE SUBMINISTRACIÓN DE INTERESE XERAL”**

\*\*\*\*\*

**ARTIGO 1. – FUNDAMENTO E NATUREZA**

No uso das facultades outorgadas polos artigos 133.2 e 142 da Constitución Española e polo artigo 106 da Lei 7/1985, do 2 de abril, Reguladora das Bases de Réxime Local e de conformidade co disposto nos artigos 15 a 27 e 57 do Real Decreto Lexislativo 2/2004, do 5 de marzo, polo que se aproba o Texto Refundido da Lei Reguladora das Facendas Locais, este Concello establece a taxa por uso privativo ou aproveitamento especial constituído no solo, subsolo ou voo das vías públicas municipais a favor das empresas explotadoras de servizos de subministración que sexan de interese xeral ou afecten á xeneralidade ou a unha parte importante da veciñanza, que se rexerán pola presente ordenanza fiscal.

**ARTIGO 2. – FEITO IMPOÑIBLE**

Constitúe o feito imponible desta taxa a utilización privativa ou os aproveitamentos especiais constituídos no solo, subsolo ou voo das vías públicas municipais a favor de empresas explotadoras de servizos de subministración que resulten de interese xeral ou afecten á xeneralidade ou a unha parte importante da veciñanza.

**ARTIGO 3.- SUXEITOS PASIVOS**

Son suxeitos pasivos desta taxa, en concepto de contribuíntes, as empresas explotadoras de servizos de subministración que resulten de interese xeral ou afecten á xeneralidade ou a unha parte importante da veciñanza, tanto se son titulares das redes a través das cales se efectúan as subministracións como se, non sendo titulares de ditas redes, o son de dereitos de acceso ou interconexión a estas. A estes efectos, inclúense entre as empresas explotadoras de ditos servizos as empresas distribuidoras e comercializadoras dos mesmos.

**ARTIGO 4.- SUCESORES E RESPONSABLES TRIBUTARIOS**

Son sucesores da débeda tributaria pendente e responsables solidarios ou subsidiarios xunto aos debedores principais, as persoas físicas e xurídicas a que se refiren os artigos 40, 42 e 43 da Lei 58/2003, de 17 de decembro, Xeral Tributaria, nos termos establecidos nos mesmos.

**ARTIGO 5.- COTA TRIBUTARIA**

O importe da taxa pola utilización privativa ou o aproveitamento especial do dominio público local a que se refire esta ordenanza consistirá no 1,5 por cento dos ingresos brutos procedentes da facturación que obteñan anualmente no termo municipal de Vilagarcía de Arousa as empresas explotadoras de servizos de subministración que resulten de interese xeral ou afecten á xeneralidade o a unha parte importante da veciñanza.

Non se incluírán neste réxime especial de cuantificación da taxa os servizos de telefonía móbil.

Entenderase por ingresos brutos procedentes da facturación os obtidos como contraprestación polos servizos de subministración prestados neste termo municipal, con exclusión dos impostos indirectos que graven os servizos prestados, as partidas ou cantidades cobradas por conta de terceiros que non constitúan un ingreso propio do suxeito pasivo e as cantidades percibidas por aqueles servizos de subministración que vaian a ser utilizados naquelas

instalacións que se atopen inscritas na sección 1ª ó 2ª del Rexistro administrativo de instalacións de produción de enerxía eléctrica do Ministerio de Economía, como materia prima necesaria para a xeración de enerxía susceptible de tributación por este réxime.

As empresas que empreguen redes alleas para efectuar as subministracións deducirán dos seus ingresos brutos de facturación as cantidades satisfeitas a outras empresas en concepto de acceso o interconexión ás súas redes. As empresas titulares de tales redes deberán computar as cantidades percibidas por tal concepto entre os seus ingresos brutos de facturación.

O importe desta taxa non poderá ser repercutido aos usuarios dos servizos de subministración a que se refire esta ordenanza.

A cota tributaria que puidera corresponderlle a Telefónica de España S.A., estará englobada na compensación en metálico de periodicidade anual a que se refire o apartado 1 do artigo 4º de la Lei 15/1987, de 30 de xullo, de tributación da Compañía Telefónica Nacional de España.

Esta taxa é compatible con outras taxas que poidan establecerse pola prestación de servizos ou a realización de actividades de competencia local das que as mencionadas empresas explotadoras de servizos de subministracións deban ser suxeitos pasivos conforme ó establecido no artigo 23.1.b) do Real Decreto Lexislativo 2/2004, de 5 de marzo, polo que se aproba o Texto Refundido da Lei Reguladora das Facendas Locais, quedando excluída polo pagamento desta taxa a exacción doutras taxas derivadas da utilización privativa ou o aproveitamento especial constituídos no solo, subsolo ou voo do dominio público local.

#### **ARTIGO 6.- DEVINDICACIÓN**

A taxa regulada nesta ordenanza ten natureza periódica e devindicarase o 1 de xaneiro de cada ano. O período impositivo coincidirá co ano natural, agás nos supostos de inicio ou cesamento no uso privativo ou o aproveitamento especial do dominio público local, en cuxo caso o período impositivo axustarase a estas circunstancias co conseguinte rateo da cota por trimestres naturais completos incluído aquel no que teña lugar o mencionado inicio ou cesamento.

A obriga de pagamento da taxa regulada nesta ordenanza nacerá no momento de solicitar a licenza ou autorización correspondente. Naqueles supostos nos que o uso privativo ou aproveitamento especial regulado nesta ordenanza non requira licenza ou autorización, a obriga de pagamento nacerá dende o inicio de dito uso privativo ou aproveitamento especial, enténdéndose que este ten lugar no momento no que se inicia a prestación do servizo de subministración de que se trate.

#### **ARTIGO 7.- XESTIÓN**

A taxa establecida pola presente ordenanza esíxese en réxime de autoliquidación que terá periodicidade trimestral e comprenderá a totalidade dos ingresos brutos procedentes da facturación obtidos no termo municipal de Vilagarcía de Arousa no trimestre natural ao que se refira a mesma.

Presentarase ao Concello de Vilagarcía de Arousa ao longo do mes seguinte a cada trimestre natural (xaneiro, abril, xullo e outubro), a través da Sede Electrónica municipal, unha autoliquidación por cada tipo de subministración efectuado no municipio segundo o modelo oficial aprobado ao efecto, no que faranse constar os conceptos que se indican a continuación:

- Importe dos ingresos brutos procedentes da facturación a consumidores finais obtidos como contraprestación polos servizos de subministración prestados no municipio ou procedentes da facturación a terceiros en concepto de acceso ou interconexión a redes propias.

- Importe a deducir das cantidades aboadas a outras empresas por dereitos de acceso ou interconexión a redes alleas.

A alta ou cesamento na prestación dun tipo de subministración de interese xeral comporta a obriga de facer constar esta circunstancia na autoliquidación do trimestre correspondente no que dita alta ou cesamento teña lugar.

Achegarase ao modelo de autoliquidación relación individualizada dos rexistros de facturación emitida no termo municipal que garanta a veracidade da información e na que constarán ao menos os seguintes conceptos:

- Data da factura
- Nome do cliente
- NIF do cliente
- Código da factura
- Código Universal do Punto de Subministración (CUPS) e/ou Número de Identificación da Subministración (NIS)
- Importes que conforman a factura

Presentada a autoliquidación trimestral correspondente, expedirase un documento de pagamento para o interesado que lle permitirá satisfacer a cota tributaria en calquera dos lugares que se indiquen no mesmo, debendo efectuarse o pagamento dentro do mes seguinte ao trimestre obxecto de declaración.

A presentación dunha autoliquidación fora do prazo establecido neste artigo, sen que medie requirimento previo desta Administración, comportará a esixencia das recargas de extemporaneidade e, no seu caso, dos xuros de mora que correspondan, segundo o previsto no artigo 27 da Lei 58/2003, de 17 de decembro, Xeral Tributaria.

A falta de ingreso en prazo da débeda tributaria a ingresar mediante autoliquidación presentada determinará o inicio do período executivo conforme ao disposto no artigo 161.1.b) da Lei 58/2003, de 17 de decembro, Xeral Tributaria e comportará a esixencia dos xuros de mora e recargas que correspondan segundo o disposto nos artigos 26 e 28 do devandito texto legal.

A falta de ingreso en prazo da totalidade ou parte da débeda tributaria que deba resultar da correcta autoliquidación desta taxa será constitutiva da infracción tributaria tipificada no artigo 191 de la citada Lei Xeral Tributaria, que se cualificará e sancionará segundo o disposto no mencionado precepto, e comportará a esixencia dos xuros de mora que correspondan de conformidade có previsto no artigo 26 da citada Lei.

### **DISPOSICIÓN ADICIONAL**

Os apartados da Ordenanza Fiscal nº II.12 Reguladora da Taxa por Utilización Privativa ou Aproveitamento Especial do Dominio Público Local que fan referencia específica á utilización privativa ou o aproveitamento especial constituído no solo, subsolo ou voo das vías públicas municipais a favor de empresas explotadoras de servizos de subministracións que resulten de interese xeral ou afecten á xeneralidade ou a unha parte importante da veciñanza quedan automaticamente derogados coa entrada en vigor desta ordenanza.

### **DISPOSICIÓN FINAL**

A presente Ordenanza entrará en vigor o día da súa publicación no Boletín Oficial da Provincia e manterase vixente mentres non se ordene a súa modificación ou derogación expresa.

## **ENTRADA EN VIGOR**

A presente Ordenanza Fiscal, aprobada a súa redacción definitiva polo Pleno da Corporación en sesión celebrada o día 20 de outubro de 2022, comezará a aplicarse unha vez transcorra o prazo previsto no artigo 49 e 65.2 da Lei 7/85, do 2 de abril, e manterase en vigor mentres non se acorde a súa derogación ou modificación expresa.

**Data establecemento da nova ordenanza:**

PUBLICADO BOP: 28/12/2022